



Obeland First

Bringet Frau und Kind in Schärme
duss hersch fremdi Fetzel lärm
Hab und Guet wänn die uns raube
s Gäld, d Kultur, sogar dr Glaube
Rippel us em Morgeland
stähle unser Vaterland
z Frankrych sait me, s darf nit sy
s gryfft dr Karl Martel dert y
nimmt sy Schwärt in baidi Händ
macht däm bese Spuk en Änd
um 800 isch me froh
sin die Moslem nimme do

Sächzähachtzig sin sy zruugg
setze d Wiener under Drugg
bringet Frau und Kind in Schärme
vor de Tor hersch d Tirgge lärm
s glingt denn schliesslig, si z vertrybe
und em Weschte, christlig z blybe

Bringet Frau und Kind in Schärme
do gsehsch dunggli Männer lärm
bisich in Köln, es isch Sylvester
d Szenerie isch nit vo Geschter
s Fuschträcht gwinnt, d Gwalt dominiert
d Frau wird dert terrorisiert
mir hänn dänggt, die syge froh
derfe sy do ane ko
doch wänn si unsri Dänkart nit
und bringe neye Regle mit
numme Frau und Kinder schitze
ka do gwiss nit sehr vyl nitze
jetz mien mir fir uns ystoh
und das funktioniert eso

S git e Kryzzug fir dr Weschte
s Oobeland kunnt z erscht, am Beschte
s brucht kai Döner anstatt Pizza
und kai Aschlag meh in Nizza
s brucht kai Tschador im Vertraue
mir vertrage wieschi Fraue
kain soll dytschi Tirgge quäle
wo dr Erdogan nit wähle
kai Erlestross-Mord in dr Baz
kai Nachtclubkrieg am Claraplatz
s brucht kai Louvre z Abu Dhabi
pffyffet nie meh dr Arabi
strych au die arabisch Zahl
hitte läbt me digital
s isch ys wurscht wenn s Frytig isch
und s kunnt Schwynigs uff dr Disch
s Fremd isch amme sehr suspägg
s foht scho a bim Dialäggt
statt „Allahu Akbar“ „Tschau mitnand“
und em Lehrer git me d Hand
s brucht kai Derwisch, kai Imam
und kai Mullah, kai Islam
au wenn d Fraue schlächt parkiere
derfe si ys haim chauffiere
mir hänn Rinder statt Kamel
und Solarstrom anstatt Eel
LED statt Aladin
Le Pen anstatt Muezzin
statt ins Hotel vom Sawiri
gosch go Schutte mim Shaqiri
Fuessball brucht s nit z Katar unde
schliesslig hän en mir erfunde
Buremailti statt Burkini
statt Halal-Fleisch Tortellini
kai Imam z Glaihynige
wo ys wott beschynige
Schwuli syge schlächt Wäse
das kasch im Koran scho läse
s brucht au kaini Konvertite
stargg verhillti Schwyzer Gritte
wo im Mischtsagg ane stehn
„nur verhillt isch s Läbe scheen“

Oobeland first haisst d Devise
d Wält lehn mir ys nit vermyse
wäge däne Islamiste
wo jetz maine, dass mir Christe
uns an ihr System abasse
do lehn mir nit mit ys spasse
denn mir bruche kai so Vogt
won ys mit sym Dängge bloggt
Scharia statt de Menscherächt
do wird s uns ganz aifach schlächt
bringet Frau und Kind in Schärme
sunscht fehn nämmlig mir a lärm

Mir sin au fir d Toleranz
aber, stohsch ys uff dr Schwanz
gsehsch die Sache nit eso
denn blybsch wohrschynts nit lang do